

重惡易知。故不別舉。方便遠離。制遮護性。遮多難識。故略提喜犯。勗令謹護。論家明分二戒。即簡遮性不同。豈得性戒。都無文耶。又世之講者。皆嫌論意難明。並謂經文易解。此由心不涉道。學不駐功。止用粗情。臆度聖語。將同世典。一往消通。沉論主聖師。理無隱味。不思綆短。翻怒汲深。雖復操觚。實同摸象。略提大要。用示來蒙。謂經如知病處方。論似診脈示病。識病用藥。疾無不瘳。故經文盡說對治。論中多明障過。請將此意。試考彼文。則從古遲疑。渙如冰釋矣。

△^{庚三}二戒能生功德二。^{辛二}標示。^{辛二}舉經。^{辛三}釋義。今初

已說從根本戒。次說根本戒與從戒。俱解脫。能生諸功德故。

△^{辛二}舉經。

經曰。此則略說持戒之相。戒是正順解脫之本。故名波羅提木叉。依因此戒。得生諸禪定。及滅苦智慧。

△^{辛三}釋義二。^{壬一}釋略說。^{壬二}釋正順。^{壬三}釋生功德。今初

論曰。從戒是戒相故。不可廣說。顯示略說應知。如經。此則略說持戒之相故。

第三明二戒功德。釋中初科。從戒者。從字去呼。方便遠離。為護根本。故云從也。是戒相者。謂前根本木叉。是其法體。從戒多別。故云戒相。微細難知。故不可廣。此且一往對分。若論遮性。各具體相應知。據經語勢。總結前科。論節于後。欲貫下文。

△^{壬二}釋正順二。^{癸一}總標。^{癸二}別釋。今初

戒是正順者。此言示現從戒義故。於此彼處說。從有二種。一者從根本戒。二者從根本所起成就戒。

次文總標中。經云戒是正順者。言此從戒。是隨順解脫之法。隨順即是從義。於此彼處說。從有二者。彼即前文。此即當科。一順前根本。二順後解脫。以經中解脫之本一句。義通前後。望前則謂此從戒順本法體。即名法體。為解脫本。在今則謂此從戒成後解脫。即目從戒。為解脫本。

△^{癸二}別釋二。^{子一}從根本戒。^{子二}根本所起戒。今初

從根本戒者。示現順根本無作波羅提木叉。如向已說故。

初科根本無作。即法體也。如向說者。指上科也。

△_{子二}根本所起戒。

從根本所起成就戒者。示現後際解脫。因中際從戒生故。如經。解脫之本故。戒是解脫體能正度故。如經。故名波羅提木叉故。此言示現能度身口意惡彼岸。成就三業解脫故。

次文從根本者。謂嚴持從戒。護前根本。由此從戒。而得解脫。故云所起成就也。示現下。牒釋初釋本義。初稟法體名前際。次起從戒為中際。終得解脫為後際。後際解脫。因今從戒而生。故指從戒為解脫本。戒是下釋名。上句標。下句釋。體是淨法。止業滅惑。莫不由之。故云正度。即解脫也。前根本戒。從果得名。欲彰從戒。同彼立號。故特結之。此下轉釋正度之義。戒如舟船。無始生死為此岸。身口意惡為中流。三業解脫為彼岸。在因則隨分解脫。至果即究竟解脫故。一切諸佛。皆有三不護是也。三業已淨。無惡可護。

△_{子三}釋生功德。

能生諸功德者。示現有色解脫功德。無色解脫功德。彼二相違。解脫功德。皆從彼生故。如經。依因此戒。得生諸禪定。及滅苦智慧故。

三中有色即四禪定。無色即四空定。四禪脫欲有。四空脫色有。故皆云解脫功德。此釋諸

禪定也。出離空慧。反上二有。故曰彼二相違。此釋滅苦智慧也。經中依因者。依謂依託。禪智依止故。因即因由。定慧由生故。滅苦即世出世果。以空破有。故云滅苦。

△^{廣四}勸修利益二。^{辛二}標示。^{辛二}舉經。^{辛三}釋義。今初

次說勸修戒利益故。

△^{辛二}舉經。

經曰。是故比丘。當持淨戒。勿令毀缺。若人能持淨戒。是則能有善法。若無淨戒。諸善功德皆不得生。是以當知。戒為第一安穩功德之所住處。

△^{辛三}釋義二。^{壬一}總標。^{壬二}別釋。今初

論曰。云何勸修戒利益。於中有五種勸。

第四勸修。總標中。修即是持。利益謂有善法。住安穩處也。

△^{壬二}別釋五。^{文如}

一者勸不失自體。如經。當持淨戒故。二者勸不捨方便。如經。勿令毀缺故。三者勸遠離諸過。身口意業。常集功德故。如經。若人能持淨戒。是則能有善法故。四者勸知多過惡。於身口意